

الحلم

اتعبني الحلم لين الواقع انكرني
كني مسكت الفرج بيدي وهديته
مافي داعي على فرقاك تجبرني
حتى الجفامنك ولعني وحبيته
الجرح عدا زمانه لا تذكرني
هـذاك وقت تعذرتـه وجافيته
لوشفت دمع القصايد كان تعذرني
تصور ان الشعر يضحك وبكيته
ماغيروني ياكود الله يغيرني
كم واحد عنك يبعدني ورديته
وفيت وادري وفايا مايصغرني
صوبت يم الهدف لاكني اخطيته
من طار سرب الغلا والشوق طيرني
شف ماعلى الارض واحد ماتعديته
خذني على صدرك الدافي وسيرني
بعض الولع ياخذ الرجال من بيته
ابنـشغل في عيونك لا تدورني
ودي بشي اشوفه مابعد جيته
خليت قلبي معك والله يصبرني،
مبطني وانا اقول قلبي وين خليته
اشتقت لك مابقيتك عاد تشكرني
تغيب والشوق ماعمري تباطيته
ماخذ على خاطري والبعد قاهرني
مدري شسوي وانا كل شي سويته
العام يوم الوعد تسبق وتنطرنـي
مستغرب شلون هالموعد تناسيته
وين انت رايج ولا كنك معبرني
ماكني الي على العالم تمنيته
لا صار هذه علومك راح تخسرني
ماعمر احد راح من كيفه وناديته
عند الكرامه ابيعك وانت خابرني
الله وكيلك ترى كل شي مريته
وكانه هجر بالسلامه روح واهجرني
اخوي لاصد عني ماترجيته

عطاالله فرحان